

## RICHARD, EDWARD (1714 - 1777), ysgolfeistr, ysgolhaig a bardd

**Enw:** Edward Richard  
**Dyddiad geni:** 1714  
**Dyddiad marw:** 1777  
**Rhiant:** Gwenllian Richard  
**Rhiant:** Tomos Richard  
**Rhyw:** Gwryw  
**Galwedigaeth:** ysgolfeistr, ysgolhaig a bardd  
**Maes gweithgaredd:** Addysg; Barddoniaeth; Ysgolheictod ac leithoedd  
**Awdur:** David Gwenallt Jones

Ganwyd yn Ystradmeurig ym mis Mawrth 1714. Enw ei dad oedd Tomos Richard, teiliwr a thafarnwr, a Gwenllian ('Modryb Gwen' fel y gelwid hi yn gyffredin) oedd enw ei fam. Cafodd Edward wersi mewn Groeg a Lladin gan ei frawd, Abraham; aeth i ysgol ramadeg y frenhines Elisabeth, Caerfyrddin, ac oddi yno i Bontygido, dan ofal clerigwr o'r enw Pugh, ysgolhaig enwog mewn Groeg. Tua 1735 neu 1736 aeth yn ei ôl i Ystradmeurig i gadw ysgol, a daeth ei ysgol yn enwog, a rhai o'i ddisgyblion yn bwysig mewn llawer cylch. Bu farw 4 Mawrth 1777.

Dangosodd Edward Richard ei fugeilgerdd gyntaf i ' [Ieuan Brydydd Hir](#), ' [Lewis Morris](#), a [Richard Morris](#), a chyhoeddwyd hi am y tro cyntaf yn *Almanac Gwilym Howel*, 1767. Yn 1776 argraffwyd yn Amwythig gan [J. Eddowes](#), *Bugeilgerdd. Yr Ail yn y Iaith Gymraeg gan Edward Richard. Awdwr y Gyntaf*. Ar ddiwedd hwn, yn un o'r ' Amryw ' yn y Llyfrgell Genedlaethol, ceir y fugeilgerdd gyntaf mewn llawysgrif, ond nid llawysgrif Edward Richard ydyw. Cyfieithwyd y fugeilgerdd hon yn Saesneg gan ' [Ieuan Brydydd Hir](#), ' a cheir ei gyfieithiad yn Panton MS. 2 (193-200). Yn *Gwaith Dafydd Ionawr*, a olygwyd gan [Morris Williams](#) ('Nicaner'), tadogwyd un o englynion Edward Richard arno. Edward Richard yw awdur yr englyn sydd gan [Saunders Lewis](#) yn ei lyfr, *A School of Welsh Augustans*, ac y mae N.L.W. MS. 5487, sef ' Diaries of the Rev. Timothy Davies ' (mab [David Davis](#), Castellhywel), yn profi ei fod yn gywir. Gweler y ddau englyn yn *Blodeugerdd o'r Ddeunawfed Ganrif*, 35. Argraffwyd gwaith Edward Richard yn 1803, 1811, 1813, 1851, 1856, a Chyfres y Fil, 1912; ac amryw o'i lythyrau yn *Additional Morris Letters*.

### Awdur

David Gwenallt Jones, (1899 - 1968)

### Ffynonellau

D. G. Osborne-Jones, *Edward Richard of Ystradmeurig with the story of his school and its associations under its successive masters 1734-1934* (Caerfyrddin 1934)

D. Emrys Evans *Y Beiriniad*, vii, 252

Saunders Lewis *A School of Welsh Augustans being a study in English influences on Welsh literature during part of the 18th century* (Wrecsam 1924)

### Darllen Pellach

Erthygl Wicipedia: [Edward Richard](#)

### Dolenni Ychwanegol

Wikidata: [Q10978349](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

